

明善堂詩集

明善堂詩集卷三十三目錄

丙戌

哭母

初夏同致齋登自在峯

登自在峯

寄友

晚至五華寺

昆明堤上

五塔寺登金剛座

萬壽寺謁量上人

夏日偕致齋泛舟遍遊靜雅山莊

望後三日同友人泛舟二首

夜坐東易堂

黑龍潭二首

溫泉二首

遊翠微山三山寺

望香界寺

題麗人午睡圖和易堂韻

秋日傅凱亭供奉爲余作山水障子沈巨瞻

縣尉爲余寫茹芝圖照因作七古以贈

秋窻偶興

題孔渭川照二首

秋日偕友人小亭閒坐次韻

和易堂平上閘泛舟元韻

和易堂重過王氏園亭感舊

直夜對瓶梅卽事

明善堂詩集卷三十三

丙戌

哭母

卅歲恩慈痛莫酬
乳乳七尺等浮漚
澤貽梧棊音容邈
訓切箕裘勸勵周
侍膳夢魂猶彷彿
分甘兒女憶
咨諏天荒地老無窮淚
灑向東風卒未休

初夏同致齋登自在峯

杖藜携侶步溪山
望裡峯巒列翠鬟
半畝濃陰移碧樹
縠紋風漾一池灣

登自在峯

陟彼崇岡巔豁然悅人目來牟捲綠濤蒼髯壓羣
木來往利名儔東西輪轂逐何如白雲閒翠屏張
六六

寄友

方塘似鑑平天光漾雲影朝曦入湘簾轆轤動金
井嬌鳥哢晴妍睡鴨頻交頸閒把種魚經素心時
引領

晚至五華寺

清和殘照麥風柔景物凭闌一放眸題壁漫勞紅

袖拂詩情畫意總風流

昆明堤上

湖上烟嵐入望濃，依稀身躡羽人蹤。
三山巒嶸披

蒼秀

萬壽玉泉香山

一水平鋪接澹溶

昆明湖卽昔之裂帛湖

蓬島

路通霄漢上仇池，境繞碧雲封。
籃輿堤畔閒容與，柳色參差綠影重。

五塔寺登金剛座

碧柳長堤掩映清流畫閣憑，
臨拾級登高遠眺携

筇小立沉吟

萬壽寺謁量上人

臨流紺宇鬱嵒龍妙旨西來問贊公
奇石恍疑登鷺嶺長河何必覓漁篷
遙傳梵放雲中出誰識禪關世外通
百尺竿頭還進步伊蒲佳味辨宗風

夏日偕致齋泛舟遍遊靜雅山莊

濃陰鬱鬱夕陽時共喜探幽繫纜遲
沙岸胎禽閒照影西山遠控碧玻璃

望後三日同友人泛舟

雨過園亭五月涼中流一櫂泛荷塘
晴霞如綺山

如畫蘋末清風送夕陽

筆床茶竈蕩虛舟蓮葉如槃綠影稠茗戰不知初
月上澄波一片鏡光流

夜坐東易堂

徜徉一榻伴深更北斗闌干南斗橫庭際尙餘書
帶草案頭猶對雪窓檠碧窓朱戶人初靜酒冷香
殘客思清角枕豸笙凝似水支頤誰與共閒情

黑龍潭

碧柳環溪蔭澄潭皎鏡明至靈通肝鬲霈澤潤蒼

生

檻外烟巒好靈湫雨氣浮沿塍喧吠蛤禾黍正油

溫泉

西郊每歲經遊覽風景偏宜首夏時不似驪山湯
沐地玉蓮花畔洗凝脂

娟娟翠竹風枝嫩謾謾蒼松古石青歸騎夕陽山
外度明霞回首覆西亭

遊翠微山三山寺

四圍峯矗秀一帶水連山戶障開圖畫窻屏列翠
鬢禪龕清且古靈境窅而閒俯檻看邨落班班路
往還

望香界寺

翠微峯秀峙瑤京古刹平坡最得名橡栗青楓山
有色溪毛碧添水多情憑臨鳥道標千尺高下龍
宮映一泓清磬數聲傳下界諸天梵唄暢無生

題麗人午睡圖和易堂韻

綠雲倭髻隱輕紗慵倚薰風蕙帶斜弱態橫陳憐

碧玉柔情窈窕倦嬌娃從知艷冶能傾國誰識丹
青解浣花莫恠蹇修期太暮芙蓉城畔七香車

秋日傅凱亭供奉爲余作山水障子沈巨瞻
縣尉爲余寫茹芝圖照因作七古以贈

秋花擢錦開重闌落英可擷秀可飡臨軒有景道
不得藉君筆底鳴飛湍淮南司馬舊名士醉墨會
經動

天子丹青不讓濠梁崔五老孱顏俄尺咫沈郎寫真
在阿堵頰上三毫何足數時清不采商山芝秘閣

初吟河漢雨無絃欲使衆山應盤礴解衣還乘興
一邱一壑意亦佳供養烟雲晨復暝吾廬真作山
水窟素壁高堂撐突兀欲書飛白賦新詩窻外西
峯青一髮

秋窻偶興

四宜軒畔滿簾秋無限晴光可放眸蝶胃遊絲飛
復止蛩吟砌草韻偏幽金風乍起青蘋末野水遙
涵紅蓼洲鄰笛一聲雲外落淒清引我更登樓

題孔渭川照

青松碧篠景清幽拍岸寒泉齒齒流讀罷丹經與
黃石金羈閒鞚牧驊騮

三十材名已冠軍鹿盧舞罷氣如雲他年位置凌
烟閣褒鄂英姿自不羣

秋日偕友人小亭閒坐次韻

積水塵襟靜遙岑拱翠來亭幽蒙薜荔石瘦長蒼
苔露重紅蕖落雲迴碧樹開招邀佳客至乘興得
追陪

和易堂平上閘泛舟元韻

清遊載酒沂晴川，欸乃聲中動畫船。
落落襟懷稱上客，翩翩儒雅志希賢。
水流曲岸聞漁笛，雲挂疎林冷露蟬。
昨向潞河會駐馬，濡毫村壁和新篇。

和易堂重過王氏園亭感舊

遙憶東臯曲徑連，勝遊踪跡又經年。
一聲南鴈楓林外，幾點昏鴉夕照邊。
臺榭參差堪入畫，漁村縹緲欲沉烟。
拈毫爲寫溪山興，秋水蘆花放鴨船。

直夜對瓶梅卽事

禁院昏黃靜不譁，朔風凜冽凍歸鴉。
篝燈展卷圍

爐坐相對橫斜冷蕊花

月三十一日

一八

明善堂詩集卷三十四目錄

丁亥

外舅常公謝世已三週矣重經湖路愴然感

賦

花朝後二日偕易堂涓雲湖上試茗

和易堂題壁韻

步新月

午夢友人寄扎覺而感賦二首

招友遊西山昆明諸勝不果索易堂和

題照二首

花時招友二首

上巳偕大兄過昆明湖堤

清明偕友遊寶藏寺昆明湖長河諸勝晚歸

燈下偶成二律却寄

初夏偶成示易堂渭雲

端陽後三日得贊咸手書兼讀近作四絕句

卽次元韻却寄

題向園畫壁

我山四章章四句

雨後二首

雨窻

初秋卽景

秋夜拈更字韻

中秋

立冬前一日題蠟梅

明善堂詩集卷三十四 丁亥

外舅常公謝世已三週矣重經湖路愴然感

賦

電光過眼歲三更
稊柳鶯黃照水明
鬱鬱佳城湖畔路
荒烟宿草不勝情

花朝後二日偕易堂涓雲湖上試茗

春融湖上小亭幽
澹宕輕風皺碧流
一縷茶烟青入座
半垣巒靄翠迎眸
泉香初淪嘗新茗
句麗分牋紀共遊
更是養花天氣好
板橋西畔繫漁舟

和易堂題壁韻

寂靜似山家吟情自不賒
峯巒朝挹秀車馬徑無
譁風起三眠柳晴開兩岸
花殘霞靚晚景林際數
歸鴉

步新月

一痕新月挂松梢
飯罷支筇度嶺坳
春水波明春
草碧昏鴉幾點集林巢

午夢友人寄扎覺而感賦

一榻閒眠體自寧
雙魚珍重啟雲屏
午鷄啼處人

初醒惆悵春波綠繞亭

猊烟結篆影霏霏倚檻西峯罨翠微春樹重重遮
望眼不勝情思立斜暉

招友人遊西山昆明諸勝不果因索易堂和
娟娟春露淨如沐好景時花感舊遊拱秀三峯矗
雲外岿巖一塔卧中流鷺兒酒映堤邊柳螺子山
浮天際舟佳客湯勞停杖屨愧無好句報琳璆

題照

一枝折得隴頭春蹀躞黃驄噴玉塵風格不同驢

背客豪吟直似五陵人

不周風勁雪繽紛
岫嶺雲遮鶴不羣
點染枝頭紅玉蕊
却教春色兩平分

花時招友

霞天錦地春爭艷
已近芳菲上巳時
一雨滿山花姹姪
西園風景報君知

紅襟雙掠綠波前
正是花濃柳媚天
好景最宜知已共
飛鴻聲裡寄籐箋

上巳偕大兄過

昆明湖堤

雨過馳道淨遊塵
草綠花濃上巳春
兩字堦筵欣雅奏
一家和氣重天親
昆明滉漾澄瑤鏡
萬壽巖從耀寶輪
緩轡沙堤頻眺望
羣峯迴合秀嶙峋

清明偕友遊寶藏寺昆明湖長河諸勝晚歸
燈下偶成二律却寄

青青河畔草痕生
况復郊原社雨晴
古寺到來聞梵放
山窓開處見人行
明湖漱灑開奩鏡
遠嶂參差染黛橫
淨域偶然留妙偈
落花啼鳥總關情

昆明湖畔草初齊
桃柳春濃入望迷
一塔凌空浮碧浪
六橋爭勝跨金堤
山銜斜日歸鞍驟
徑繞長河宿鳥啼
乘興欸扉聞暮鼓
呼燈重檢舊詩題

初夏偶成示易堂涓雲

半牕浮碧映簾虛
一榻慵眠畫漏餘
花柳迎眸人眷眷
亭臺斜日景徐徐
曠懷最愛閒鷗鳥
適興還同老蠹魚
池上會心皆妙境
聊將閒筆紀幽居

端陽後三日得贊咸手書兼讀近作四絕句

卽次元韻却寄

寂歷山窓隔市譁
千章夏木集啼鴉
故人遠寄銀鈎字
琢句初開菡萏花

簾外霏微雨氣侵
那堪東望海雲深
知君攬勝憑高處
倚劍層臺對客吟

青嶂雲收隱翠微
想臨流水釣漁磯
蘋花風散鳧鷗集
落日還饒燕子歸

花隱疎籬霧氣濛
香風閒度小亭空
月明遠思人千里
翹首雲山薊樹中

題向園畫壁

一葉扁舟盪碧流
森森夏木小亭幽
遙連雁齒紅橋杳
萬笏嶙峋接遠眸

我山四章章四句

我山成矣我池盈矣
畧約平矣小舟橫矣
開我北窓納我微涼
檀欒猗猗搖曳新篁
雨霽山青偃仰坐隅
門無剝啄琴鶴相娛
熙兮皞兮樂有道兮
山水清兮從吾好兮

雨後

暇日步西園
雨洗遙山秀
竹杖踏芳林
雲影波光

透凭欄聽鳥聲倚石看鷗宿長歌發朗吟拈毫思
再復

小苑景初晴閒雲掛簷角開窓息塵氛看山青翠
斲涼颼若新秋草木欣初濯自酌覺爽然襟懷殊
卓犖

雨窓

浙浙虛窓雨脚來遙看西崦墨痕堆輕盈乳燕翻
朱幕啜喋文魚破綠苔點滴聲傳蓮漏永霏微林
外鶴雛迴翛然五月清涼甚題咏何須統扇裁

初秋卽景

方畦不子徑廻環
菜甲青青十畝間
閑策瘦藤看抱甕
墨雲送雨過前山

秋夜拈更字韻

樹影沉沉北斗橫
沈寥天氣夜晴明
但憑玉漏聲催急
我自閒吟韻押更

中秋

西崦殘陽望已收
木樨香滿玉輪秋
光凝几席寒侵袂
影度簾櫳風入樓
露冷候蛩生地籟
霜清涼

雁下蘭洲青天碧海無窮思尊酒閒歌聊當遊

立冬前一日題蠟梅

階前殘菊已經霜洞裏寒梅報早芳馨口檀心含
正色南枝一夜發天香

明善堂詩集卷三十五目錄

戊子

季春恭送

母如靈輿安葬水東寢園藏事之餘感愴以誌

登超塵臺

題徐守之畫冊

題畫梨花

哭筠庭

南至日題瓶中黃梅

題畫索易堂和

明善堂詩集卷三十五

戊子

季春恭送

母妃靈輿安葬水東

寢園蒞事之餘感愴以誌

無計娛親效老萊

慈恩罔極重低徊

寢園歲月悲王考顧復劬勞痛母綰滿目春光花
灑淚驚心風木鳥銜哀佳城鬱鬱承

天眷展祀兒心到夜臺

登超塵臺

極目憑高翠色連春原如繡草芊芊超塵臺上重
回首彈指流光已卅年

題徐守之畫冊

渺渺晴波隔遠山疎林曲岸是漁灣
道人不用爲貪
垂餌恰對沙鷗自在閑

題畫梨花

掩冉輕雲籠弱枝鉛華不御黯情思
夜深香夢無人覺步障空教護麗施

哭筠庭

三酹含餘痛靈兮定有知西陲留偉績南詔駐雲
旗毅魄吞羣醜英風闡四偉抒忠

仁王痛俎豆壯新祠

南至日題瓶中黃梅

一脉幽香透骨寒莫教朔管爲吹殘三秋蓓蕾盈
珠貫半子芬芳吐絳檀庾嶺嶺頭應更好孤山山
畔共誰看邇來詩思慵拈筆獨對軍持坐夜闌

題畫索易堂和

霜月梅花映玉人
峭寒無睡自凝神
不知誰是題
詩客只把春山細寫真

明善堂詩集卷三十六目錄

己丑

九思兄折枝梅見遺吟謝後卽作圖以報二
首

咏西府海棠

閒聆雅曲恰值牡丹初放遂口占二絕句

山園雨窻漫成四首

畫荷

西園道中四首

明善堂詩集卷三十六 己丑

九思兄折枝梅見遺吟謝後卽作圖以報

秣瓶紅蕊綻春妍折得猶然帶露鮮
鶯唱一園當畫景遺來恰好伴詩筵

南枝已放北枝舒著意臨摹畫不如
絕好幽情晴日下教人題到殿春餘

咏西府海棠

西府名葩色更勻雨餘倍覺有精神
只將好句酬佳麗裁錦何須步障新

閒吟雅曲恰值牡丹初放遂口占二絕句

小院風柔景物融宮商迭奏曲偏工斜陽影裏清

和候喜對芳華照檻紅

苑中牡丹初放

絳苞最愛乍開時帶露臨風折一枝注向軍持供
嘯咏明霞彩暈正相宜

山園雨窓漫成

靄靄山光翠作圍消閒清晝掩園扉牖開喜對霏
微雨更見營巢燕子歸

淡淡重雲入望收林塘清興可娛眸烏皮几倚閒

窓下蒲劍荷錢綴小洲

幾片飛花點硯池
濕雲如墨雨如絲
鳧鷖亦解人無事故
近軒頭狎碧漪

白板橋頭柳似幢
野鳧白鷺自雙雙
桃笙一枕堪成夢
隔水初驚吠小龍

畫荷

亭亭出自汙泥外
色界虛空施妙繪
玉井曾聞藕似船
欲折朱華張翠蓋
風晴露冷委殘紅
好盪輕舸牽荷帶
誰寫芳姿雜藻中
柳陰塘北香清瀨

西園道中

凌晨赴西園雨過山如洗
忽憶高軒人嫩涼眠未
起

森森夏木陰掩映遙山秀
迷濛烟樹間薊門見微
溜

望裏數峯青黛色悅人目
肩輿顧盼中反覺吟情
獨

頽雲壓樹低委折入馳道
爽氣淨囂塵乘涼歸及
早

明善堂詩集卷三十七目錄

庚寅

題贈施春壑松泉調軫圖小照

施春壑將之官南河以詩留別卽和原韻以

贈四首

初夏

窓下

夏日偶成

夏日園居

自題畫荷二首

題扇

題畫松二首

畫山水

時在巴顏溝

畫菊

秋塞夢侍九思大兄旣醒作以奉寄

和汪時齋重九韻

贈謹齋甥四首

和題畫荷花

明善堂詩集卷三十七

庚寅

題贈施春壑松泉調軫圖小照

流水高山一曲琴溪雲嵐影意俱深太和在抱人
誰識謾謾松風和雅音

施春壑將之官南河以詩留別卽和原韻以

贈

一曲驪歌首夏天詩筵頓作別離筵方將半載匆
匆別空使雲山望處連

春流遶砌碧於羅尊酒留君奈若何盡說愚山詩

句好風流今已屬南河

憶昔聯吟適性情而今製錦抑何榮
長途風物多堪此紙貴還應在此行

別時三復話難窮只望從今爵更隆
淮浦鶯花今正好可將錦句寄郵筒

初夏偶成

又聽晴溪兩部蛙藥欄徒倚與偏賒
人驚初夏雲多變鶯送餘春柳半遮
竹可通風抽嫩笋麥堪媒雉吐輕花
心閒對此渾無事懶向青門學種瓜

窻下

高卧北窻牖心閒地亦清
夢中來鳥語松下落碁
聲日轉樹偏暗雲開花自明
煮茶烟繚繞相對盡
忘情

初夏偶成

花間輕漏長庭際日卓午
山鳥倚簷鳴乳燕依簾
舞髡柳綠初濃安榴紅欲吐
清晝自閑閑虛懷含
太古

夏日園居

日華堂詩集 卷之二十一 二
開窗納爽靜無譁砌轉槐陰日影斜鳥欲依人窺
竹箔魚因分浪觸菱芽黃庭臨罷烹新茗綠蟻方
殘理釣車莫道園居清晝永牙籤不讓鄧侯家

自題畫荷

亭亭玉立散清香翠蓋擎珠風度涼粉本漫臨疏
綺下心神早在碧橫塘

雨後風來五月寒碧波深護畫欄干錦雲亂印池
頭水窈窕風姿取像難

題扇

羈旅誰描半面春秋風團扇障輕塵幾回睡醒桐

陰下把玩渾忘是幻人

是日常
山峪作

題畫松

潑墨淋漓類我師

昔林晴江
師亦能畫

蒼蒼鱗甲挺竒姿寒

廬忽作秋濤響想到天台坐聽時

蓮舟空憶漾平湖一頃玻璃點翳無我本愛花如

茂叔醉中幾度展斯圖

畫山水

時在巴顏溝

雪作寒聲冷閉門行營兀坐且傾樽不須金碧開

生面宛對江天落照村

畫菊

無聊行帳聽秋笳古塞寒連大漠沙幸有丹青破
岑寂不虛重九對霜花

秋塞夢侍

九思大兄既醒作此奉寄

霜冷行營夜氣清秋風一枕卧深更宵來夢裏同

兄坐覺後猶疑坐有兄

是日扎克丹
鄂佛羅作

和汪時齋重九韵

秋風颯颯葉翻霜地冷山荒草色黃幸得塞垣清

興好一詩一酒樂重陽

是日扎克丹鄂佛羅作

贈謹齋甥

霜寒日淡塞垣邊策馬行行祇自憐別去又逢還
再別更多繾綣悵離筵

九月笳聲漫繫思歸籥剛值菊花時

謹齋甥自八月至京扈從

木蘭於九月中 諭歸藩部 襜褕雁過天無際應憶秋廬下馬

詩

匝月論心尔我同一尊丹葉餞西風不堪去後重

回首漠漠寒雲度遠鴻

言旋瓊幄意悽悽山令林疎入望迷明月有情知
我意清光流過萬峯西

和題畫荷花

秋色冷虛窻心清澄若水撫此不染姿綽約西子
美憶昔納涼時淨綠擎中沚雖無吳女歌時見白
鷗起亭亭遠世塵清馨孰與比碧筒酌幾時花仙
乃集此淡雅脫紅衣精神凝素紙君子得瑤篇愧
余報無以靜念濂溪言製裳空自喜

明善詩集卷三十八目錄

辛卯

初春試筆用譚生韻二首

浩然閣觀劇有憶謹齋甥二首

浩然閣觀劇偶作

謝僧惠牡丹

清和雅集和時齋來詩韻

郊行

初夏至園偶題

哭雲在大兄六章

題畫扇四首

夏日郊行

河庭卽事二首

種竹

至潞河題天成寺壁

秋日過雲在兄宅二首

秋日雨窻卽事

秋日病中作

明善堂詩集卷三十八

辛卯

初春試筆用譚生韻

爛爛卿雲卜世昌
圭璋自愧列天潢
杯傳椒酒逢元日
衣惹爐烟侍

聖皇朝退漫舒花
柳眼客來巧製錦
雲裳一年佳境皆堪咏
披拂春風興未央

花鳥笙歌滿玉京
遊人隨地記詩程
孟春試筆成新句
丙夜閒吟感舊情
鴻漸傳經閑自檢
玉川作記可齊名
風光暄麗更如此
雅集西園列友生

浩然閣觀劇有憶謹齋甥

淡淡春風薄薄雲
輕寒送雨淨塵氛
清霄靜聽陽阿曲
解得深情獨屬君

拂柳遊絲花滿墀
金尊檀板觸離思
何當客散鳥聲樂
獨憶春三去歲時

浩然閣觀劇偶作

深紅淺紫百花飛
小院清歌趁夕暉
醉後忽驚春欲去
一簾風靜燕初歸

謝僧惠牡丹

富貴春光幾日奢
招提惠我意無涯
如來未必憐
嬌卉只欲人情悟
此花

清和雅集和時齋來詩韻

旖旎歌臺上
清和結瑞烟
昇平陳雅樂
絲管奏華筵
金闕鍾初動
銀燈月並懸
茶鐺烹活火
玉琖酌春泉
映席花含蕊
迎風柳放絲
吟情真澹蕩
逸興欲飛騫
對景聯新句
當杯少集賢
西園多勝事
載筆和瑤篇

郊行

明善堂詩集

卷之三十八

二

得得近山行染黛清且潔平看十萬峯青翠如屏
列動我千里思無乃空意熱歸來小憩間池亭聊
自悅

初夏至園偶題

朱櫻初熟荐山家徙倚雲林對落霞軟飽呼童汲
新井水晶瓶裏插時花

哭

雲在大兄六章

展矣君子寤寐思服終溫且惠寧不我顧寬兮綽

兮溫其如玉心之憂矣瞻望弗及

願言思子寤寐求之夙興夜寐其誰知之悠悠蒼
天中心好之殲我良人企予望之

愴其歎矣永矢弗過顛倒思予傷如之何輾轉反
側碩人之邁悠悠我思涕泗滂沱

耿耿不寐曷維其已我心憂傷泣涕如雨豈無他
人宛其死矣子之清揚我之懷矣

愴我寤歎恩斯勤斯原隰裒矣我心傷悲搔首踟
躕寧莫之知陟彼岡兮哀我人斯

獨寤寐歌淑慎其身維子之好豈無居人願言思
伯黽勉同心乃如之人兮其人美且仁

題畫扇四首

蓼蓼金柳半垂隄無力迎風葉未齊試問借枝雙
翡翠春初曾作幾聲啼

題梯柳

時際晴光鬪物妍閒情瀟灑自堪憐誰將富貴三
春景寫向齊紈獨占先

題牡丹

分明瘦影倚疎籬欲嗅寒香蝶未知莫謂淵明歸
去後獨無人愛九秋時

題菊

雅淡丰標迥出塵一枝先占十分春
渾疑吟到三更後雪滿山空倍有神

題梅

夏日郊行

長途一望柳如烟雲濕羣峯入畫連
好是綠溪荷芰岸農人三五插閒田

河庭卽事

連霄梅雨水平堤夏木千章入望齊
閒坐小亭山黛遠隔離遙唱午村雞

茶烟輕篆午風涼雲影波光引興長
獨坐河庭對

修竹翛然身若在瀟湘

種竹

庭外多栽竹成陰夏日宜棲鸞原有待憂玉自因
時舊籜隨風響新篁待雨滋此君相對久颯爾覺
神怡

至潞河題天成寺壁

昨霄阻河東今朝至彼岸復識古招提

昔會宿此

更覺

祇園煥

時廟更新

梵貝散天花書畫盈壁案

僧能書畫

乘暇

及早餐美飽釜飢爨

用六祖故事

秋日過

雲在兄宅

眷令折翼夏初時
舊第今過無限思
更是秋風淒
慘處教人回首獨含悲

院宇深沉正素秋
淒情忍淚蹙雙眸
於今獨恨人
天上空使幽居一片愁

秋日雨窗卽事

空階疎雨一天秋
簾外陰沉樹色幽
冷蝶拂鬚粘
白粉殘蕉捲葉瀉青油
驚回詩夢衣嫌薄
濕透蛩

聲酒自謀獨坐閑堂雲影散西南山外淡烟浮

秋日病中作

迢迢晴宇淨無塵蛩語秋光冷刺人因病情懷心
靜處一窻涼月白如銀

明善堂詩集卷三十九目錄

壬辰

元旦試筆

初春筵集浩然閣全餘圃有成

贈歌者

閒筆

初春至園

晚興

壽張監八十

暮春至大覺寺晚歸喜成

暮春偶興

園中早起

和禪語

悼女

明善堂詩集卷三十九

壬辰

元旦試筆

甲煎燒殘歲暗增
旭輪初向海中升
宜春帖子聊從俗
椒酒梅花的我朋

初春筵集浩然閣全餘圃有成

剪月裁雲滿賀囊
迎春不惜酒千觴
當前與爾閒論古
莫管韓娥聲繞梁

贈歌者

宛轉輕歌曲曲新
迴波媚眼十分春
最憐異日嬌

日三下二言イフ
クニスニニフ
一
容減未必朱門念可人

閒筆

遠山橫翠鎖窗寒又見鴉歸晚照殘寂寂鞦韆花
影畔春愁慵倚碧欄杆

初春至園

淑景滿園林風光取次尋池塘空夢草歲月轉驚
心晝漏催宵漏花陰間柳陰判春春已至曳杖且
長吟

晚興

西峯散斷霞林際晚烟斜飯罷思裁句閒情對暮
鴉

壽張監八十

喜爾籌添八十期

先園息老正相宜掃壇笑指松花落瞥見青羊一

解頤

千年松脂
化作青羊

暮春至大覺寺晚歸喜成

林園倏忽值殘春花開綺錦如雲屯閑來遣興適
郊外使我曠懷山水濱旬有九日天氣好肩輿得

得清心神西山屏列秀而窈尋芳時結招提因昔
年曾過香花地光陰荏苒如奔輪入門古栢自天
矯石橋方沼遊金鱗殿宇淳素兼雅寂翠堵千尺
崑之根清流汨汨飛下上泉聲松韻疊相巡禪房
境僻鐘鼓靜倒垂瀑影峯嶙峋漏傳午刻晝偏永
胡麻一飽福天申箇中樂事吾誰與滿堂笑語情
多真言歸羲馭沉昧谷濡毫頓就篇章新

暮春偶興

午帳夢初醒開窗對野汀花明蜂繞徑人靜鳥喧

庭小坐吟紅雨看山瀉綠醺春歸渾不管萬慮一時屏

園中早起

曙氣生亭榭晨驚鴉出林蓮香凝露重山色帶烟
沉鹿麕巖前跡人思醉後吟携筇時小立默會有
無心

和禪語

不見難時不見難于中叅透總閒閒有無知向空
空悟心自心兮山自山

悼女

情深鞠育五年餘也學晨昏道啟居笑語幾時依
阿母音容一旦去荒墟春遊山寺誰知夢夏繞園
亭空問予此際令人腸欲斷燈前相對全內子淚漣
如

明善堂詩集卷四十目錄

癸巳

春日閒居

偕妙明主人至園代成二截句

至園見海棠初放喜而成咏二首

海棠大開復題其下二首

再題海棠花下二首

雨後全妙明主人再咏花下二首

再至園中見棠零落復題花下二首

初夏園中偶成

題秋江待渡圖

初夏雨後全妙明主人

早起雨後偶成

對雨二首

季夏中浣全汪時齋耿晴齋宗秋岩西園卽事

西園晚興

初秋西軒對雨

初秋靜樂緣對雨

和韶亭見寄原韻

秋夜

題畫扇

中秋前五日對月

除夕

明善堂詩集卷四十 癸巳

春日閒居

山園鶯唱驚塵夢
春日風微透碧櫺
當戶雲痕晴
樹遠閒吟適
值酒初醒

借妙明主人至園代成二截句

輕輿欸欸出城西
一到林亭嫩綠齊
侍女莫拋紅
豆去
柳陰深處惱鶯啼

翠黛橫空映綺霞
捲簾風軟靜無譁
燕飛不解春
歸去
猶向閒堦剪落花

至園見海棠初放喜而成咏

猩紅幾點欲開時脉脉含情雨後宜弱態仙姿誰
得繪當前不用說徐熙

半笑還疑半帶嗔東風無力晚粧新三郎且拭看
花眼春睡初醒最可人

海棠大開復題其下

嬌嬈沉醉倚平蕪俗韻全消態自殊莫道無香空
有色太真應亦妬清腴

風度橫塘動綺霞柔姿窈窕隔窻紗更憐庭畔新

經雨添得深紅一樹花

再題海棠花下

垂絲欲斷心還繫絳口凝朱綠袖長春雨一宵嬌
欲滴啼痕壓倒漢宮粧

銀燭高燒照艷姿花濃花淡總相宜幾回睡去還
扶起正是宵分帶露時

雨後仝妙明主人再咏花下

輕雲漠漠釀春寒共瀉金樽帶笑看濕透紅粧何
所似楊家妃子淚偷彈

蜂抱花鬚夢裡忙
嫣然承露拂雲裳
春風桃李皆零落
爭似仙姿映夕陽

再至園中見棠零落復題花下

點點飛花積砌均
簾前芳雨見輕拋
遊蜂濕蝶殘紅裏
無計留春句費敲

綠暗紅稀靜掩扉
柔心芳思逐春歸
怕看此日雕欄外
隨雨隨風片片飛

初夏園中偶成

別墅風光逸性宜
况當首夏暮春時
晝初長矣得

新霽花亂飛兮辭舊枝燕語頻驚簾影動漏聲催
去竹陰移靜中對此清和景石鼎烹泉好咏詩

題秋江待渡圖

長空色映碧漣漣數筆秋江奪化工晴浪渡遲看
自穩不將持滿一帆風

初夏雨後全妙明主人

濕雲隱約掛雌霓新綠葱葱雨後齊蘭吐香棲金
翡翠烟波光湛碧玻璃人醒午夢衣粘絮花舞初
晴燕墮泥相對忘言多妙境御風飛去得天倪

早起雨後偶成

聽殘一夜廉纖雨
早起驚飛老樹鴉
萬井濕雲歸野岫
一簾晴日度輕紗
綠肥曲徑多生蘚
紅泣閒堦有落花
祇爲病多吟性懶
襟懷乍爽興無涯

對雨

蕉窻竹徑日陰沉
魚戲新荷綠水深
滴滴簷前浸簾冷
心清把卷自閒吟

湘簾高捲漏聲微
點滴閑階濕地衣
雲影度山垂雨脚
茶烟凝處燕初歸

季夏中浣全汪時齋耿晴齋宗秋岩西園卽

事湯成

一邱一壑盡清幽雨後晴光好共遊自古文章推
李杜於今賓客盡應劉閒吟老樹千重碧共賞平
畦十畝周多士會來堪眺望西山指點悅人眸

西園晚興

平林夕照晚鐘殘小雨初晴六月寒四野蛩吟秋
色近西園風景足盤桓

初秋西軒對雨

西軒小雨絕纖塵雲影英英作細鱗秋水鷺飛翎
已濕啣泥燕過語含嗔陰沉曲檻甘蕉冷寂寞空
階落葉新靜聽那堪聲淅瀝蘭舟愁殺采蓮人

初秋靜樂緣對雨

四野蟬聲咽早秋輕烟薄霧望中收苔凝三徑樹
初老雨落一天山更幽池上獨憐紅粉泣亭前誰
解綠雲愁清風颯颯塵襟爽畫偈詩禪孰與酬

和韶亭見寄原韻

方知冷署似仙家喬履洪丹未足誇兩袖清風無

一事好將樽酒對黃花

秋夜

秋夜景沉寂遙鐘聽有無竹風敲鐵馬桐雨滴山
厨蛩語寒堦砌鴻聲冷荻蘆挑燈吟不倦杯酒自
相娛

題扇畫

蕭蕭風景爽清秋山靜雲閒人倚樓寫得幽禽霜
月冷潺湲松底石泉流

中秋前五日對月

未屆三五夜閒看坐窻北清光漸欲圓照我檐之
側蛩語冷堦除柝聲催漏刻玉露滴桂芬天香襲
淮色惜春自有人悲秋誰共憶惟我問素娥古今
幾盈昃

除夕

歲除今又至詩酒且爲耽却怪如駒隙明朝五有

三明日乃五
十三歲矣

明善堂詩集卷四十一目錄

甲午

元旦試筆二首

立春偶成

仲春西園全妙明主人對雪

適余公務方回得晴齋耿子新句是日燈下

倚韻和之

春晚漫成

春日隨

駕再至南苑恭紀

至園

暮春早起

殘春偶興

走筆和晴齋耿子謝魚來韻

對月

閒中對雨二首

雨後對月

秋夜二首

冬至前一日山寺偶興

冬夜觀劇有憶謹齋甥

和晴齋耿子寄興原韵

水仙

雪窓

贈晴齋耿子兼索卽和

冬夜句酬汪時齋兼索和余

酌興和耿子韵

冬夜饋耿子兼索立和二首

明善堂詩集卷四十一

甲午

元旦試筆

甲午洪鈞轉天開淑景多元辰依舊賀如意作新
歌椒柏含元氣笙簫協太和休徵朝野忭忻拜

六龍過

斗柄寅初指乾坤景運隆瑞烟凝紫極旭日麗彤
宮岸柳臘容改山梅春意融吟成新試筆珍重貯
詩筒

立春偶成

撫鏡自憐潘鬢改心驚閭闔轉星躔新詩欲貯珊瑚網臘酒初斟玳瑁筵

帝闕雲霞開曙色龍津楊柳織輕烟家家年少簪金勝竹馬懽呼

堯舜天

仲春西園全妙明主人對雪

共吟柳絮遙空舞猶似西園梅亂飛姑射山中寧有骨羅浮夢裡不勝衣一簾粉蝶迷芳徑二月冰花鏤素輝無力東風宜薄酒還看銀鶴破雲歸

適余公務方回得晴齋耿子新句是日燈下
倚韻和之

暄妍景物足徘徊夾道花香拂袖來歸得新詩入
圖畫久無剪燭暢尊罍白雲獨伴應劉客青眼誰
憐賈董才欲報瓊瑤天已晚拈毫不覺漏聲催

春晚漫成

流鶯高唱落花時簾外東風綠滿枝半醉不知春
已去月明閒寫送春詞

春日隨

駕再至南苑恭紀

南苑晴光麗趨承瞬卅年鶯簧迎

輦奏花意望

君憐水暖萍如玉風輕柳作綿春蒐鷹武尚隨從共
忻然

至園

斜陽烘染翠鬟遙柳絮沾衣緩度橋春樹晚鶯啼
不住滿園烟景畫圖饒

暮春早起

遶檐好鳥驚殘夢正是星疎月淡時徙倚晴階山
黛曉一簾紅雨罨游絲

殘春偶興

又值風翻婪尾時疎簾晝靜日遲遲春歸莫嘆流
鶯老啼散楊花總不知

走筆和晴齋耿子謝魚來韻

京口鱒魚旨且多

耿子京
江人

遠勝園沼釣春波所遺

羣鮒何堪齒笑煞神仙張志和

對月

夜色沉沉花影移
恰當蝶夢未醒時
半鈎斜挂丁香上
欲向嫦娥寄所思

閒中對雨二首

雨中歸燕啄香芹
虛砌無人石髮芬
煮茗靜看窗外景
一亭濃綠一山雲

五月閒亭小雨涼
淡烟薄霧繞千章
黑甜初醒微風度
點點斜浸薜荔牆

雨後對月

雨脚乘風去
朦朧月上時
玉鈎懸樹遠
銀練度花

遲露氣逼芳榭苔痕凝碧墀照醒蝴蝶夢星斗落
清池

秋夜

銀漢橫斜夜氣幽空堦露冷一天秋碧梧疎影搖
金井葉落西風蟋蟀愁

烟凝樹杪起微寒捲幔吟秋興未闌風靜漏清人
寂寂碧空星斗正闌干

冬至前一日山寺偶興

小至陽生暖又回荒涼野寺自傾杯無聊情緒寒

風裏憑仗山窗雪與梅

冬夜觀劇有憶謹齋甥

一堂簫管暖如春
醉折梅花意俱新
曲罷滿天霜
月冷仰看征雁問伊人

和晴齋耿子寄興原韵

松風謾謾繞晴溪
寄到新詩日欲西
把酒常思文
舉客談玄聊對處
宗雞一聲寒笛山
光合十丈濃
烟樹影齊我坐虛
窓羣籟靜會心何
必問鴉啼

水仙

銀臺金盞暗飄香
羅襪輕盈步玉堂
六幅裙拖湘水碧
渾疑仙子道家粧

雪窻

窻虛忽生白同雲何漫漫
聽此折竹聲玉塵飛歷
亂姑射神仙來臨風聊一粲
坐久貂裘寒金爐爇
獸炭嗟彼採樵人太息平橋斷

贈晴齋耿子兼索卽和

已知冰雪作精神不許梅花獨鬪
新清夢直遊天姥
上前身應是謫仙人

冬夜句酬汪時齋兼索和余

羣籟無聲自飲醇半窻竹月想伊人聞知子敬風

流甚挑盡寒燈寫洛神

文端公善書時齋亦如之故云

酌興和耿子韵

糟邱自古風流極山簡嵇康逸興多我亦不辭三百
百殘閒澆吟筆暢如何

冬夜饋耿子兼索立和

遺君新釀潤詩筵膾斫銀鱗試小鮮風味恰宜寒
夜領梅花影瘦月當天

梅開凍萼臘將殘
寒漏成吟意興寬
幸有青州老
從事圍爐相對足盤桓

明善堂詩集卷四十二目錄乙未

題謹齋甥照二首

悼妾

再成

春日偶題謹齋甥舊寓

西軒閒坐

晚春

卽興

海棠二首

晚春垂釣

瓶中藤蘿

偶興

有感二首

喜雨

月下偶成

輿中口占

觀劇柬邀餘圃

新秋觀劇有感二首

七夕後四日月下宿舟中漫成

秋夜贈晴齋耿子卽和來韻

雲林書屋卽事二首

秋雨索耿晴齋和

偶感二首

中秋和晴齋耿子來韻二首

秋海棠

聽雨

題松溪歸艇圖

明善堂詩集

卷之四十二目錄

二

直所對雪索耿晴齋二首

和汪時齋索蠟梅原韻

燈下對梅二首

題畫松索耿晴齋和

明善堂詩集卷四十二 乙未

題謹齋甥照二首

寒風獵獵騁華駟
草淺沙平一望收
日落滿山禽帶馬
逼人英氣孰爲儔

白鹿銀麈逐電過
矢無虛發不須多
荒烟漠漠關雲冷
宛似當年射塞河

悼妾

靈光殿賦誰堪誦
楊柳櫻桃轉繫思
鸚鵡無端聲喚急
劇憐春夢乍醒時

再成

燈花落盡句頻敲，斜月溶溶挂柳梢。
有夢空教蓬島憶，春宵無那恨難拋。

春日偶題謹齋甥舊寓

萋萋芳草十年夢，亭館依然景物非。
懸榻無人蛛網寂，落花滿地鳥聲微。
不來舊雨空相憶，獨醉新醅未忍歸。
遙望璿瑜風暖處，珊瑚鞭玉勒拂晴暉。

西軒閒坐

暄風晴吹碧桃開，簾捲西軒海燕來。
拂座清香紅

歷亂半池新漲綠
澗靜觀春色都堪醉
頻度鶯聲莫漫猜
鎮日支頤何所事
身心應不染纖埃

晚春

軒畔山桃開又殘
令人潘鬢自驚看
聲聲黃鳥輕饒舌
似報春光一指彈

卽興

風度爐香日影遲
擘箋閒咏送春詩
遊絲無力誰相引
輕拂疎簾燕不知

海棠三首

柔情初值睡醒時
銀燭高烧好咏詩
綠擁雲鬟嬌不語
絕勝春色耐人思

燈前雨後總相宜
啼笑生妍蝶姊隨
自是神仙多逸韵
問誰堪補少陵詩

嬌嬈沉醉玉欄斜
妒煞東風歷亂花
輕禱染來窈窕甚
丰姿未許俗人誇

晚春垂釣

殘照滿春山
娛情綠水間
蜻蜓隨釣艇
楊柳蘸溪灣
在藻魚知樂
垂綸竟日閒
更煩舟子力
鼓棹入

烟寰

瓶中藤蘿

蒙茸紫葢插軍持
春日尋香蜂蝶痴
弱態含情扶不起
教人有憶樂天詩

偶興

露滴新梧月上初
垂綸趺坐自如如
翛然非學桐江侶
却喜花飛典白魚

有感

又見斜陽罨翠嵐
韶光荏苒靜中探
魯陽縱有揮

戈術華髮頻催我未堪

繽紛冠蓋擁天衢壯氣何曾嘆白駒五十年來醒
蟻夢心情直欲赤松俱

喜雨

商霖細滴鮮花塔風暖清塵景色佳雨玉雨珠非
所願滿窓新綠愜余懷

月下偶成

漏月出鱗雲隔林聞輕磬灑灑清風來澄心證空
定

輿中口占

風閣雲臺細雨斜，肩輿午漏出東華。
歸來且自判花柳，鼓吹何須兩部蛙。

觀劇東邀餘圃

響遏行雲度曲遲，疎簾晴日午鐘時。
周郎一顧風流甚，餘圃來時恐亦痴。

新秋觀劇有感二首

淡雲薄日釀新秋，一曲吳歛莫與儔。
忽憶卅年清夜裏，鈞天縹緲在瀛洲。

芭蕉翻碧雨餘天
含態騰芳繞畫筵
會似彤庭歌湛露
離離簫管樂

堯年

七夕後四日月下宿舟中漫成

蜿蜒垂虹飲潞河
柳陰野艇臥漁蓑
沉沉玉兔飛孤塔
寂寂牽牛隔素波
一枕蟬聲秋樹冷
半篙蘆影暮雲多
村鷄兩岸驚人夢
幾度凌虛擊檝歌

秋夜贈晴齋耿子卽和來韻

剪燭高吟宋玉詞
秋風颯颯月橫時
明珠在握蚌

初老良賈深燕人未知我欲一樽邀客醉誰憐長
笛倚樓吹知君此際山齋靜鴻雁聲中得好詩

雲林書屋卽事

三徑清幽靜不譁綠雲斜捲透窻紗夢回午簟人
初醒鸚鵡聲聲喚送茶

新霽湖山翠欲流窻延花木更清幽寒螿鐵馬西
風裏都爲雲林點綴秋

秋雨索耿晴齋和

梧桐點滴密雲浮濕透空階蟋蟀愁鴻雁乍來聲

帶冷誰憐宋玉賦三秋

偶感

蕉鳴疎雨綠如油一片蛩聲祇自愁
霜鬢暗隨霜葉改令人感慨念浮漚

風光荏苒去難留雁影橫斜帶月流
此際芙蓉江上老問渠能耐幾多秋

中秋和晴齋耿子來韻

時當三五桂香浮灑灑清光滿畫樓
雁度雲霞歸海角笛吹梧葉落山頭
任他歌舞傳新曲獨我眠

遲感舊遊莫道武夷仙路遠水輪湧出一天秋
天上人間一半秋問誰曾作廣寒遊金焦有夢詩
魂冷蟾兔無心練影流幾曲霓裳初對酒三更玉
漏獨登樓陰晴明夜知何似且擘雲牋共唱酬

秋海棠

嫣然弱態不禁秋風過墻陰翠色流無限幽懷低
欲訴幾翻啼笑半含羞

聽雨

蒼茫烟樹迷衡宇潑墨陰雲凝澹圃颯颯西風生

暮寒蕭然臥聽芭蕉雨

題松溪歸艇圖

何處倦遊者翛然物外閒
身隨木蘭舫心在白雲
山夾岸青松合迎門綠水灣
數椽棲隱地點綴似
仙寰

直所對雪索耿晴齋和二首

大地呈佳瑞凌晨入早朝
雲從天外冷雪向檻前
飄玉屑鋪鴛瓦冰花綴柳條

楓宸無限景得句與偏饒

掖垣生素彩六出集螭坳潔似曹衣剪輕於謝絮
拋墀邊築鹽虎天外舞銀蛟撥火裘嫌薄烹茶句
自敲綺窻梅影亂朱閣玉柯交滕六神功溥來年
慶四郊

和汪時齋索蠟梅原韻

映雪橫釵磬口纔一枝折向案頭俛知君也愛黃
香甚聊贈尊前手自撿

燈下對梅

獵獵寒風晚閉關神仙來自藐姑山玉蟲挑盡渾

無事瘦影橫窓月一灣

夢到羅浮清且都燈紅酒綠最堪娛圍爐但覺寒
香襲不許徐熙入畫圖

題畫松索耿晴齋和

文通新染墨痕香寫得支離貌古蒼鐵骨不知三
徑雪龍鱗常帶九秋霜影搖明月蟠欹石濤撼清
風滿畫堂老榦可堪棲白鶴參天黛色十尋長